



人代紀要卷之十五

明吳興顧應祥編集

大埔黃宸校刊 江陰湯明善校正

庠生倪佩 臧繼華同校

千午梁武帝天監元年四月以後

春正月齊蕭衍入建康自為相國封梁公加九錫
進爵為王擄東昏侯妃余氏烝之

以沈約為僕射范雲為侍中

殺齊宗室湘東王寶暉并其弟寶覽寶宏又殺邵
陵王寶攸晉熙王寶嵩桂陽王寶貞 鄱陽王寶

寅夜踰墻逃奔魏

夏四月蕭衍篡齊國號梁改元天監廢齊主寶融為巴陵王居姑孰欲以南海郡為巴陵國沈約曰不可慕虛名而受實禍衍領之使鄭伯禽至姑孰以生金進寶融曰我死不須金乃醉以醇醪摺殺之又追尊為齊和帝以寶義為巴陵王齊嬖臣孫文明等入梁宮欲復仇平之梁立子統為太子

齊蕭道成以己未年四月篡宋位至壬午年四月為蕭衍所篡傳七主共二十三年

癸未

梁以沈約范雲為左右僕射

梁以謝朓為司徒

梁吉淵年一十五代父死宥之

齊鄱陽王蕭寶寅至魏請兵伐梁魏封為齊王與

兵屯東城

魏以彭城王勰為太師

甲申

春正月魏改正始元年

魏司徒北海王詳有罪幽死 築九城備邊

乙酉

梁初立孔子廟置五經博士立州縣學

丙戌

魏執楊紹先滅其國立東益州 魏罷塩池之禁

魏秦州王法智推呂苟兒為主改元建明

涇州民陳瞻稱王改元聖明

是年柔然庫者可汗卒子伏圖立號佗澣可汗改

元始平

梁有三象入建業

東西夷四十國修貢于魏

魏后于氏暴崩皇子昌亦卒人皆曰高肇弑之

魏京兆王愉反稱帝信都改元建平李平克信都

執愉魏主欲宥愉高肇陰使人殺之又奏除李平

名

戊子

魏永平元年 八月改

魏立高肇女貴嬪為后譖殺彭城王勰仍謚武宣
柔然佗汗可汗為高車彌俄突所殺子醜奴立號
豆羅伏跋豆伐可汗改元建昌

巳丑 魏主專尚釋氏大興佛寺

庚寅 梁行大明曆祖冲之造者 作綠淮塘

魏胡克華生子詡

辛卯 梁以張稷為青冀刺史

壬辰 魏延昌元年

魏以高肇為司徒清河王懌為司空

夏四月改元 冬十月魏立子詡為太子自是不

殺太子母

癸巳

梁沈約以憂懼卒謚隱侯

約夢齊和帝劍割其舌呼道士奏章梁主怒

甲午

梁築淮堰

魏楊津為華州刺史

乙未

梁淮堰潰復築

春正月魏主殂年三十三謚宣武皇帝廟號世宗

葬景陵太子詡即位年六歲是謂肅宗孝明皇帝

胡太后稱制

劉騰元義輔政

廢高太后為尼

誅高肇

胡太后以女弟為女侍中

沙門法慶作亂于冀州討平之

丙申

魏孝明帝熙平元年

正月改

夏四月梁淮堰成長九里樹以楊柳軍壘列居其

上

秋九月淮堰壞聲聞三百里死者十萬餘口

魏大興佛寺

是年柔然破高車殺其王彌俄突

丁酉

梁罷宗廟犧牲

戊戌

魏神龜元年

春二月以得神龜改

魏胡太后殺太后高氏

遣使西域求佛書

復鹽禁

巳亥 魏崔亮為吏部尚書立停年格

魏胡太后遊嵩高 魏國用不足減百官祿

高句麗王雲卒世子安立

庚子梁普通元年 正月改 魏正光元年 七月改

魏侍中元義殺清河王懌幽胡太后于北宮專政

魏主冠改元正光

是年柔然殺伏跋可汗其國人立婆羅門為可汗

弟阿那環奔魏立為蠕蠕王

辛丑 魏以宦官劉騰為司空 魏納阿那環于柔然不

克

高車擊柔然可汗婆羅門降魏分柔然為二以處

婆羅門阿那環

壬寅 梁西豐侯正德奔魏逃歸

柔然婆羅門叛魏費穆擊破之執歸洛陽

癸卯 梁鑄鐵錢

魏沃野鎮民破六韓拔陵反改元真王

魏元義專利牧守令長皆貪污故人皆思亂魏亂

始此

魏劉騰死

甲辰 魏秦州莫折念生反自稱天子改元天建

高平酋長胡琛反

乙巳 魏孝昌元年

梁主初納東昏侯姬吳淑媛七月而生子綜封豫章王是年叛降于魏改名蕭贊魏立為丹陽王

夏四月魏胡太后復臨朝誅元義 以嬖臣鄭儼

徐紇李神軌為中書舍人 六月改元孝昌

徐州元法僧反改元天啓 上谷杜洛周反改元

真王高歡從之 山胡劉蠡升反自稱天子改元

神嘉

丙午 魏五原鮮于脩禮反改元魯興其帥元洪業殺脩

禮降魏其黨葛榮復殺洪業自立改元大通又改

廣安

丁未梁大通元年 春三月梁王捨身同泰寺群臣贖還改

魏陳郡民劉獲鄭辯反於西華改元天授尋敗

蕭寶寅殺關右大使酈道元稱齊帝改元隆緒

是年杜粲殺莫折念生降魏

戊申 魏武泰元年 魏孝莊帝建義元年又改永安

春正月魏潘貴嬪生女胡太后祕言生子大赦改

元武泰

二月魏胡太后自以所為不謹見魏主年長嬖臣

鄭儼徐紇畏誅與太后密謀酖弒魏主年一十九
謚孝明皇帝廟號肅宗葬定陵初欲立潘嬪所生
偽皇子既而迎高祖孫臨洮王世子釗立年三歲
太后稱制

三月大都督爾朱榮以高歡為前鋒自太原舉兵
入立長樂王子攸是為敬宗孝莊皇帝改元建義
執胡太后及幼主釗沉于河殺王公以下二千人
自為都督中外諸軍事封太原王還洛陽專制
爾朱榮女先為肅宗嬪至是復立為后

劉先王初入蜀欲納劉瑁妻吳氏而疑於同族
法正曰論其親疎何與晉文之於子圉乎遂納
之爾朱榮之女已先為肅宗嬪矣又欲納為后
魏主疑之黃門侍郎祖瑩曰晉文公在秦懷嬴
入侍事有反經合義獨何疑焉遂從之榮甚悅
佞人之可惡如此

葛榮殺杜洛周併其眾爾朱榮以將侯景為前驅
擒斬之時宇文泰在葛榮部下爾朱榮愛其才留
為統軍

秋九月以葛榮平改元永安爾朱榮自為丞相
是年河間邢杲反改元天統

魏胡琛將万俟醜奴稱帝改元神獸

魏汝南王悅臨海王彧北海王顥俱奔梁梁以元顯為魏王遣將軍陳慶之將兵納之 元彧還魏

魏羊侃徐紇奔梁

是時魏已有君矣納之甚無謂也

巳酉梁中大通元年

九月梁主再捨身於同泰寺群臣以錢贖回改元

春正月魏主追尊父彭城王勰為皇帝 邢杲平

夏四月北海王顥攻拔滎城稱帝改元建武魏主攸出走河内顥入洛陽爾朱榮自晉陽入逐顥走死迎攸復位榮自為天柱大將軍

庚戌

魏更興元年
魏主曄建明元年

梁蕭贊死于魏柩歸葬以子禮 梁復以汝陽王

元悅為魏王

春三月爾朱榮遣將爾朱天光平万俟醜奴執蕭寶寅魏主悅改元更興

秋九月魏主攸誘爾朱榮入朝誅之其黨爾朱兆等舉兵自晉陽入徙魏主于河東弑之年二十四謚武懷後改孝莊廟號敬宗葬靜陵立長廣王曄于長子改元建明

太保城陽王徽投寇祖仁祖仁殺之送首於北

辛亥

魏節閔帝普泰元年
廢帝中興元年

梁昭明太子統卒以綱為太子封統子歡為豫章

王譽為河東王譽為岳陽王

魏殺侍中楊侃太保楊椿司空楊津夷其族津子

愔逃奔高歡以為行臺右丞

春二月爾朱世隆廢其君曄為東海王立廣陵王

子恭于洛陽是為節閔帝改元普泰

高歡起兵討爾朱氏

冬十一月高歡立章武王子渤海太守元朗于信

都改元中興自為丞相

壬子

魏孝武帝末熙元年

梁封西豐侯正德為臨賀王

夏四月高歡入洛陽廢魏主恭幽於崇訓寺又自

為詔策命元朗禪位立平陽王脩是為西魏孝武

歡自為丞相改元太昌廢元朗為安定王尋弒之

併弒曄恭立高歡女為后

冬十二月改元末興以同明元時年號復改末熙

癸丑

甲寅

東魏孝靜帝天平元年

熒惑入南斗

魏主欲圖高歡奔長安

十二月魏主與宇文泰飲酒進毒弒之年二十五

謚孝武殯于佛寺十餘年始葬

高歡以誅斛斯椿為名舉兵犯闕魏主脩奔長安

歡入洛陽立清河亶子善見是為東魏孝靖帝年

十一遷都于鄴改元天平

按魏主脩淫其同產妹明月帶入長安為宇文

泰所殺因此成隙脩之醜行如此豈可以為人

君乎

魏自拓跋珪都平城至孝文改姓元都洛陽至

孝武圖高歡不克奔長安歡立善見于鄴分為

東西二魏起太祖丙戌盡孝武甲寅凡一十三

主一百四十九年

乙卯梁大同元年 正月改 西魏文帝大統元年

梁同泰寺建無遮大會 梁鄱陽妖賊鮮于琛反

改元上願內史陸襄討平之

春正月魏宇文泰立南陽王寶炬改元大統是為

西魏文帝自為安定公柱國

東魏高歡擊稽胡斬劉蠡升 封高洋為太原公

東魏始賦文武官祿

丙辰 梁處士陶弘景卒 梁都下地震生白毛

東魏高歡以子澄為尚書令輔政

冬十二月高歡殺清河王亶

丁巳 梁修長干塔

戊午 東魏元象元年 以得巨象改

梁得佛舍利大赦 東魏禁立寺

己未 東魏興和元年 以新宮成改

魏宇文泰廢魏主后為尼以柔然女為后

東魏以高歡女為后

庚申

辛酉

壬戌 梁安成妖人劉欽躬作亂改元末漢湘東司馬王

僧辯討平之 東魏以侯景為河南大行臺

癸亥 東魏武定元年 正月改

東魏以侯景為司徒 築長城西自馬陵東至土

塏

甲子 是年李賁自稱越帝改元大德

東魏以高澄為大將軍領中書監

乙丑

丙寅 梁中大同元年

夏四月梁主幸同泰寺講金字三慧經仍捨身皇太子以下奉贖設會改元中大同是夜同泰寺災以岳陽王譽為雍州刺史中書監

丁卯梁太清元年

侯景叛東魏降魏復叛歸梁以為河南王

二月梁主屏除乘輿法服幸同泰寺捨身群臣以錢一億萬贖回大赦改元太清

東魏高歡卒是為北齊高祖神武皇帝子澄繼事自為都督中外諸軍錄尚書事勃海王幽其主善見于宮中

戊辰

兩月相承如鉤見西方

天裂于西北長十丈

冬十一月梁臨賀王正德引侯景兵圍臺城正德稱帝改元正平

是年交州司馬陳霸先平李賁

己巳

春三月侯景陷臺城廢蕭正德為大司馬尋殺之

夏五月梁主餓死淨居寺在位四十八年壽八十

六謚武皇帝廟號高祖塋修陵太子綱立是為太

宗簡文帝侯景專制 熒惑守心

冬十二月始興太守陳霸先起兵討侯景

東魏高澄為膳奴蘭京所殺是為北齊世宗文襄
皇帝弟高洋繼事

庚午梁簡文帝大寶元年 北齊文宣帝天保元年

春正月梁改元大寶 侯景自稱漢王娶梁主女

溧陽公主

魏立蕭詵為梁王

春正月東魏高洋自為丞相都督中外諸軍錄尚
書事封齊王

夏五月高洋逼東魏主禪位國號齊改元天保是
為北齊顯祖文宣皇帝廢善見為中山王

東魏善見甲寅年高歡所立都鄴庚午年為高
洋逼禪凡一十六年

辛未梁豫章王天正元年

秋八月侯景廢梁主綱為晉安王殺太子大器及
王侯在建康者二十餘人立昭明太子之子歡之
子豫章王棟改元天正自為大丞相

冬十月王偉說侯景弑梁主以絕衆心景使偉與
彭儁王修纂以酒進梁主綱盡醉而寢儁進土囊
修纂坐其上而殂年四十九所著詩文甚多

侯景復廢梁主棟為淮陰王篡位國號漢改元太

始

是年春三月魏主寶炬卒年四十五謚文皇帝葬
永陵子欽立是為廢帝

夏四月魏隴西公李虎卒

冬十二月北齊高洋使人酖殺東魏主善見謚曰
孝靜葬于鄴西後忽掘而投諸漳水

壬申梁元帝承聖元年 魏廢帝大統元年

梁武帝第七子湘東王繹自江陵起兵遣王僧辯
陳霸先等討侯景侯景敗走吳僧辯兵入建康大
焚掠居民號泣侯景為羊侃之子羊鴟所殺送尸

建康傳首江陵

豫章王棟與其二弟橋樛相扶出於密室二弟曰
今日始免橫死矣棟曰倚伏難知吾猶有懼宣猛
將軍朱買臣呼之就舡並沉於水

蕭繹擁兵上流坐視君父之難而不行援救方
且與從子交兵相殘嘗與蕭賁雙陸食子未下
賁曰殿下都無下意繹深憾遂因事害之其意
蓋欲甚侯景篡弒之罪而自取之也豫章王棟
為景所立又為景所廢鎖禁密室釋之可也而
併其二弟殺之何辜焉所為若此而欲享國之

父惡可得乎

夏四月梁武陵王紀稱帝成都改元天正

冬十二月湘東王繹即位于江陵是為世祖孝元皇帝改元承聖

以王僧辯為司徒陳霸先為征虜將軍開府儀同三司

魏廢帝大統元年

齊得傳國璽

侯景之敗以璽自隨其侍中趙思賢掌之曰我死宜沉于江思賢濟江遇盜從者棄之草間至

廣陵以告郭元慶取以送鄴

以楊愔為僕射尚太原公主

按太原公主東魏孝靜帝之后也愔常仕於魏者而納主之后可乎

是年兩日俱見

癸酉 梁武陵王紀敗死

魏宇文泰自加都督諸軍事

是年突厥伊利可汗死弟木杆可汗侯斤立

甲戌梁貞陽侯天成元年 魏恭帝

梁主繹講老子於龍光殿

冬十月蕭愔引魏兵入江陵執梁主繹梁主焚圖書十四萬卷以寶劍擊柱折之嘆曰文武之道今夜盡矣遂被殺

魏取襄陽令蕭愔帝于江陵以兵守之

王僧辯陳霸先奉晉安王方智于尋陽承制

議者謂梁武講佛經而有臺城之禍湘東講老子而有江陵之禍可為溺於佛老者之戒不特是也帝王之學與書生不同圖書十四萬卷亦何益之有

魏始作九命九秩之典

春正月宇文泰廢其主欽置之雍州立其弟齊王廓是為恭帝復姓拓跋氏尋弑欽

乙亥梁敬帝紹泰元年

後梁宣帝天定元年

春正月齊主以兵納梁貞陽侯蕭淵明于梁

春二月梁晉安王方智自尋陽入建康即梁王位年十三是為敬帝

夏五月王僧辯奉貞陽侯淵明歸建康立之改元天成降方智為太子

秋九月陳霸先殺王僧辯廢淵明為建安公復立方智改元紹泰稱藩于齊

方智繹之子當立者也淵明蕭懿之子不當立者也王僧辯之奉淵明畏齊兵也陳霸先雖能立方智而復稱藩于齊亦畏齊兵也當時梁若有人迎昭明太子之子啓于江陵而立之尤得倫理之正惜乎見不及此而陳霸先又急於自取豈樂為之或曰啓以魏兵殺繹而又立之是成其篡也曰非篡也梁武舍孫而立次子貽謀不減以致骨肉相攻繹嘗殺譽矣又殺歡之子棟三人啓豈復仇耳

齊以道士為沙門

是年春正月蕭啓稱帝于江陵改元天定是為後梁中宗宣皇帝仍稱臣于魏
廣州刺史王琳救江陵不及兵次長沙伐後梁

丙子梁太平元年

梁陳霸先自為司徒長城公 五月建安公淵明卒 秋九月改元太平 徵王琳為司空不至
魏宇文泰卒子覺繼自為周公

齊大治宮室築長城

丁丑陳武帝末定元年

北周愍帝明帝

春二月魏宇文護立宇文覺為天王國號周是為

八代紀要 卷之十五 七
愍帝廢魏主廓為宋公自為大司馬西魏亡
周祀園丘定郊廟之制

西魏自文帝寶炬巳卯年立於長安盡恭帝丁
丑凡三主共二十二年

周冢宰楚公趙貴太保衛公獨孤信見宇文護專
政貴欲謀殺護信止之護聞遂殺貴免信官尋又
殺之自為大冢宰 周宇文護弒魏主廓謚為恭
帝

秋九月周主宇文覺惡宇文護之專欲去之謀於
張光洛等光洛以告護遣柱國賀蘭祥等逼周主
遜位幽於舊第廢為畧陽公尋弒之黜其后元氏
為尼迎岐州刺史寧都公毓立之是為周世宗明
皇帝毓宇文泰長子也

周人歸梁主繹之喪於王琳陳霸先遣兵擊琳
梁陳霸先自為相國封陳公加九錫冬十月遂篡
位國號陳改元末定是為陳高祖武皇帝廢方智
為江陰王親祠蔣帝廟

梁自武帝壬年代齊命傳至敬帝丁丑凡四主
五十五年為陳霸先所篡

齊築重城 齊主幽其弟永安王浚上黨王渙於

地牢

有術士言亡高者黑衣齊主問左右何物最黑
答曰無過於漆渙行第七遂執之浚為青州刺
史以齊主嗜酒裸程為樂浚切諫齊主怒收之
皆盛以鉄籠寘於地牢飲食溲穢俱在一處

戊寅

梁王琳以末嘉王莊稱帝改元天啓

夏四月梁江陰王方智卒年十六或曰陳主弑之
謚為敬帝

綱目於是年書陳主霸先弑江陰王然史魚明
文瓊山丘氏世史正綱又於陳宣帝太建二年

書陳頊弑故梁主方智尤為無據弑逆大故豈
可輕加於人故今書或曰弑之以存疑

陳主捨身於大莊嚴寺

周宇文護自為太師

齊主洋如北城視地牢臨穴嘔歌令二王和之浚
渙悲怖聲顫齊主愴然泣下欲赦之長廣王湛與
浚不睦進曰猛虎安可出穴齊主默然使左右刺
之浚渙號哭呼天乃燒殺之以二妃賜左右之殺
浚渙者

齊減百官祿

按高洋嗜酒淫佚肆行狂暴袒露形體街坐巷宿揚情宰相使進廁籌以馬鞭鞭之流血浹袍所幸薛嬪無故斬首支解弄其髀為琵琶高氏婦女不問親疎往往亂之或以賜左右不從者手刃之每醉輒殺人為戲動多支解或投之烈火或棄之漳流鄴下簡重囚置之仗內號供御囚欲殺則以應命可謂殘忍不仁之極矣聞二王之悲怖猶有愴然之心蓋良心之發見也湛也一言以阻之湛亦不仁甚矣

巳卯

周明帝武成元年

夏六月陳主殂在位三年壽五十七謚武皇帝廟號高祖葬萬安陵兄子臨川王蒨即位是為世祖文帝

秋八月周宇文毓始稱皇帝改元武成

齊主殺魏宗室二十五家盡滅元氏之族

冬十月齊主殂年三十一臣下無泣者謚文宣帝

廟號顯祖葬武寧陵子殷立年六歲

庚辰陳文帝天嘉元年 齊主殷乾明元年

齊孝昭帝皇建元年

春正月陳改元天嘉 陳武帝太子昌自長安回

陳主以為衡陽王濟江使侯安都殞于中流
是年主琳伐陳不克與梁王莊俱奔齊

夏四月周宇文護憚其主嚴明使膳部郎大夫
李安置毒于餼鮓進之周主知中毒口授遺詔以
子幼立弟宇文邕而卒年二十七謚明皇帝廟號
世宗邕封魯公是為高祖武皇帝

齊春正月改元乾明 三月高演殺楊愔自為丞
相 秋八月高演以王晞謀啓太后廢殷為濟南
王而自立改元皇建是為孝昭皇帝即位晉陽太
后戒之曰勿令濟南有他演立子百年為太子

辛巳

周武帝保定元年 齊武成帝大寧元年

春正月周武帝改元保定 宇文護自加都督中
外諸軍事

秋九月齊主演弑濟南王殷

齊主演初許長廣王湛為皇太弟及即位立百
年為太子湛不平齊主居晉陽湛守鄴是時濟
南閔悼王在鄴望氣者言鄴中有天子氣齊主
使平秦王歸彥徵濟南湛內不自安問計於高
元海元海獻三策如梁孝王故事從數騎入晉
陽見太后主上請去兵權不干朝政上策也表

請青齊刺史沈靜自居中策也更問下策逼之
乃曰濟南世嫡主上奪之今集文武斬歸彥立
濟南號令天下以順討逆萬世一時也湛大悅
未能用林慮令潘子密曉占候潛謂湛曰殿下
當為天下主湛乃送濟南至晉陽齊主密行鴆
毒濟南不從乃扼而殺之

冬十一月齊主演墜馬折肋婁太后視疾問濟南
所在者三不答太后曰殺之耶死亦宜矣怒而去
乃徵弟湛立之與書曰百年無罪可以樂處置之
勿效前人也遂殂年二十七謚孝昭皇帝湛即位

是為世祖武成皇帝改元天寧廢百年為樂陵王
史稱高演既殺濟南後頗愧悔初苦內熱頻進
渴散時有尚書令史姓趙於鄴見文宣從楊愔
燕子獻等西行言相與復讐演在晉陽宮與毛
夫人亦見之病漸危篤備襪厭之事或者煮油四
灑或持炬燒逐諸厲方出殿梁騎棟上歌呼自
若了無懼容時有天狗下乃於其所講武以厭
之有兔驚馬墜而絕肋臨終之際惟扶服牀枕
叩頭求哀史冊所書必有所據宜附錄以為為
惡者戒

壬午

齊河清元年

春正月齊王湛立妃胡氏爲皇后子緯爲太子
夏四月婁太后卒

青州言河水清改元

齊王逼通兄后李氏生女李氏不舉齊王詬曰爾
殺我女我殺爾兒對后以刀環築殺后子紹德后
大哭齊王怒裸后搯之遣爲尼

冀州刺史高歸彥作亂伏誅

周始命貴臣食邑 送陳安成王頊還陳頊妃柳

氏子叔寶猶在穰城陳遣人請之俱歸陳

後梁主蕭詧以封疆褊隘邑居殘毀疽發背而殂
子歸立是爲世宗明皇帝

癸未

後梁明帝天保元年

陳司空侯安都以驕橫被殺

周養老于太學 頒大律

齊侍中和士開諂諛勸齊主極意爲樂齊主大悅
荒淫不聽政命和士開與胡后握槩河南王孝瑜
諫曰皇后天下之母豈可與臣下接手和士開與
趙郡王叡共譖孝瑜奢僭醜殺之諸侯在官者莫
敢舉聲惟河間王孝琬大哭而出

甲申 周封李昞為唐公 始令百官執笏

齊主以白虹貫日欲殺樂陵王百年厭之使人召之百年知不免割帶玦與妃斛律氏而入齊主使左右亂捶氣息將盡乃斬之棄諸池水盡赤妃把玦哀號不食而卒

乙酉 齊後主天統元年

夏四月齊主湛傳位于太子緯是為後主改元天統自為太上皇 以祖挺為秘書監

丙戌陳天康元年 周天和元年

夏四月陳主昺在位七年壽四十五謚文皇帝廟

世祖塋未寧陵太子伯琮即位是為臨海王以安

成王頊為司徒錄尚書事

春正月周改元天和元年

齊始用士人為縣令 殺河間王孝琬

丁亥陳臨海王光大元年正月改

安成王頊專制

安成王頊殺中書舍人劉師知僕射到仲舉

戊子 冬十一月陳始興王伯茂以安成王頊專政肆惡

言安成王頊遂以太后令誣陳主與劉師知華皎等通謀廢為臨海王黜伯茂為溫麻侯使盜殺之

項武帝兄第二子禧之弟也

周隋公楊忠卒子堅繼事

楊忠弘農華陰人漢太尉震八代孫鉉仕燕為

北平太守鉉生元壽元壽生太原太守惠嘏惠

嘏生平原太守烈烈生寧遠將軍貞貞生忠從

周起兵賜姓普六茹氏封隋國公

周納突厥木杆可汗女阿史那氏為后

齊上皇湛殂年三十二謚武成皇帝廟號世祖葬

永平陵

人代紀要卷之十五終

人代紀要卷之十六

明吳興顧應祥編集

大埔黃宸校刊江陰湯明善校正

庠生倪佩臧繼華同校

巳丑陳宣帝大建元年

春正月陳安成王項篡位是謂高宗改元大建

齊和士開初為世祖湛所嬖出入卧内遂幸於太

后齊主深委任之威權日盛與婁定遠等號為八

貴太尉趙郡王叡當太后前數其罪出為兗州刺

史士開以美女珠簾獻婁定遠得見太后泣訴詔

責嚴不臣之罪嚴入諫執送華林園拉殺之
夏四月齊以嬖寵高阿那肱為尚書令韓長鸞為
領軍陸令萱為女侍中穆婆提為侍中祖挺為祕
書監

武衛將軍高阿那肱都督韓長鸞皆齊主倖臣
陸令萱其夫駱超謀叛沒入掖庭為宮婢子婆
提亦沒為奴齊主在襁褓令萱養之引婆提入
侍齊王朝夕戲押冒姓穆

庚寅

齊武平元年 正月 庚寅

齊以梁永嘉王莊為梁王許其興復

秋九月齊立子恒為太子
以和士開為尚書令

辛卯

秋七月齊王弟琅邪王儼欲誅和士開等與侍中
馮子琮謀使治書侍御史王子宜彈士開罪子琮
雜他文書奏齊王可之儼誑領軍庫狄伏連收士
開斬之復以劉辟疆言欲斬穆婆提母子齊王出
斛律光引儼請罪以年少釋之支解庫狄伏連王
子宜劉辟疆殺馮子琮

陸令萱復勸齊王使劉桃枝拉殺儼年一十四有
遺腹四男皆幽死復追贈楚恭哀帝以慰太后

冬十月齊王幽胡太后于北宮

太后與沙門統曇獻通齊王未之信至是朝太后宮見二尼悅而召之皆男子也事遂發曇獻伏誅遂幽太后太后爲齊王設食齊王不敢嘗

壬辰

周建德元年

周王惡宇文護專計令赴太后宮讀酒誥周王以玉珽擊踏于地命左右斬之周王始親政大赦改元建德

齊祖珽諂事陸令萱得爲僕射

祖珽讒殺左丞相咸陽王斛律光以珽知騎兵外兵事

齊王廢后斛律氏立胡太后兄女胡氏爲后陸令萱使人行厭蠱之術胡氏精神恍惚言笑無恒齊王復立昭儀穆氏爲右后令萱復譖於太后呼胡后出剝其髮送還家廢爲庶人以右后穆氏爲皇后自是令萱勢傾内外自太后以下皆聽其指揮矣

是年突厥木杆可汗死弟佗鉢可汗立

癸巳

周以隋公楊堅女爲太子贊妃 白鹿不爲瑞齊以嬖臣高阿那肱錄尚書事尋爲司徒

齊王忌蘭陵王長恭貌美有威望醜殺之

夏六月齊王遊南苑喝死從官六十人

齊王立侍婢馮小憐爲淑妃

甲午 周太后叱奴氏卒周王行三年喪

周王廢佛道教毀淫祠 周立通道觀

齊南陽王綽見婦人抱兒取以飼狗復以兒血塗

婦縱狗食之齊王鎖至行在宥之問在州何樂對

曰聚蝎於噐置狙其中觀之極樂齊王即命索蝎

置浴斛使人裸卧其中號叫宛轉齊王喜噉不已

讓之曰如此樂事何不早馳驛奏由是大寵韓長

鸞嫉之使人誣告其反殺之

錄之以備齊主之惡

乙未 周伐齊

丙申 齊隆化元年 齊安德王延宗德昌元年

冬十月周王自將伐齊取平陽

周兵攻平陽齊王緯方與馮淑妃獵于天池告

急者三至丞相高阿那肱曰大家正爲樂邊鄙

小事何急奏聞及暮使至則平陽已陷矣齊王

將還妃請更殺一圍從之

十一月齊王率兵救平陽不克

周王以齊師盛欲西還以避其鋒以梁士彥為
晉州刺史守平陽齊師圍之城陷十餘步將士
乘勢欲入齊王敕且止召馮淑妃觀之妃粧點
不時至周人以木拒塞之城遂不下

十二月周王復自將伐齊齊王敗走晉陽遂奔鄴
以安德王延宗為并州刺史改元隆化

時齊王與馮淑妃並騎觀戰齊師東偏小却淑
妃怖曰軍敗矣穆提婆曰大家去大家去齊王
走兵遂大潰

晉陽人立安德王延宗為齊帝改元德昌周王拔
晉陽執延宗以禮待之穆提婆降周以為柱國陸
令萱自殺

穆提婆齊之嬖臣叛主而降周不惟不誅又以
為柱國何以為勸哉

史稱齊主聞晉陽立延宗謂近臣曰我寧使周
得并州不欲安德得之

丁酉 齊幼主恒承化元年

周主毀壯麗宮室 焚九尾狐 省宮嬪

春正月齊主緯傳位于太子恒年八歲改元承化
周師圍鄴緯出走齊丞相高阿那肱引周師追緯

及恒獲之遂滅齊

夏四月周主至長安封高緯為溫公

冬十月周人誣高緯與穆提婆謀反併其宗族皆賜死夷其族

齊范陽王高紹義稱帝北朔州改元武平

後梁朝周

稽胡立劉蠡升之孫沒鐸稱聖武皇帝改元石平周討平之

北齊自文宣帝高洋庚午年篡東魏傳至幼主恒丁酉為後周所滅凡六主二十八年

戊戌

周宣政元年

春三月周始制紗幘改元宣政

夏六月周主北伐歸殂于乘輿在位十九年壽三

十六謚武皇帝廟號高祖塋孝陵太子贊即位是

為宣帝

以楊堅為大司馬周主殺其叔父齊王憲

是年齊高紹義奔突厥

巳亥

周

宣帝贊大成元年
靜帝闡大象元年

春正月周改元大成

二月周主贊役兵四萬人治洛陽宮

周主贇殺徐州總管王軌宮正宇文孝伯

贇為太子時多失德宮尹鄭譯寵幸用事王軌言於武帝杖太子除譯名武帝臨終執宇文孝伯手囑以後事至是召譯為內史問曰我脚有杖痕誰為之答曰事由烏丸軌宇文孝伯贇遂殺軌讓孝伯曰公知齊王憲謀反何以不言孝伯對曰臣知齊王憲於社稷為群小所譖且先帝付囑微臣雖令輔導陛下今諫而不從實是負顧託以是為罪是所甘心贇大慙命將出賜死

稔宇文孝伯忠矣但言及王軌將鬚之事無乃歸過於人以求自全耶

周以趙王招女千金公主妻突厥和親

是月周主贇傳位太子闡年七歲自稱天元皇帝改元大象所居曰天臺冕二十四旒車服旗鼓咸以二十四為節復佛道二像天元與之並坐大陳雜戲令士民縱觀鑄永通萬國錢以一當千

冬十二月作乞寒胡戲

庚子 周天元立五后俱以天為號

夏五月周天元殂楊堅入朝總朝政自為大丞相突厥執高紹義送周徙蜀死

秋七月周趙王招惡楊堅專政邀堅飲酣以佩刀刺瓜欲殺堅堅將元胄扶出不得刺堅遂誣招與越王盛謀反併殺之及其諸子

冬十二月楊堅進爵隋王加九錫以高頴爲司馬

辛丑

隋文帝開皇元年

春正月周改元大定

二月楊堅禪周位國號隋改元開皇是爲隋高祖
文皇帝立獨孤氏爲后世子勇爲太子諸子廣爲
晉王俊爲秦王秀爲越王諒爲漢王廢周主闡爲
介公盡滅宇文氏之族改周太后楊氏爲樂平公

主欲奪其志不從

夏五月隋主堅潛使人弒周主闡仍哭于朝堂謚
爲靜帝葬于恭陵

秋七月隋定服色人主着黃袍始此 鑄五銖錢

上柱國鄭繹以罪免 頒新律

隋律取魏晉齊梁沿革折衷重輕去前世梟輶
及鞭法自非謀叛以上無收族之罪死刑二絞
斬流刑三自二千里至三千里徒刑五自一年
至三年杖刑五自六十至一百笞刑五自十至
五十又制請減贖官當之法以優士大夫除前

世訊囚酷法考掠不得過二百枷杖大小咸有
程式民有枉屈縣不為理者聽以次經郡及州
若仍不為理聽詣闕伸訴楊素等十餘人修之
而皆取決於率更令裴政此律一頒遂為萬世
齊民之則故備錄之

是年突厥佗鉢可汗卒謂其子菴邏曰吾兄不立
其子委位於我我死當讓兄子大邏便國入以其
毋賤竟立菴邏大邏便不平菴邏不能制以國讓
攝圖號沙鉢略可汗居都斤山菴邏降居獨洛水
稱第二可汗大邏便謂沙鉢略曰我與爾俱可汗

子各承父位爾極尊我獨無位何也沙鉢略患之
以為阿波可汗還領所部又沙鉢略從父玷厥居
西面號達頭可汗各統部衆沙鉢略勇而得衆人
皆附之千金公主傷宗祀覆滅言於沙鉢略統兵
伐隋隋主遣奉車騎都尉長孫晟如突厥

初長孫晟送千金公主至突厥在彼住久與沙
鉢略弟遊獵知其山川形勝部衆強弱晟上書
言於隋主遣入反間果相猜貳

北周自宇文泰篡西魏都長安至武帝滅北齊
至靜帝為楊堅所篡起閔帝丁丑至靜帝庚子

此五主二十四年

壬寅 春正月陳主頊次子叔陵抽刀弑太子悶絕柳
后救免蕭摩訶帥師捕叔陵斬之太子叔寶即位
是為陳後主頊在位十四年壽五十二謚宣帝廟
號高宗塋顯寧陵

癸卯陳後主至德元年

春三月隋遷新都于龍首山城調役 弛酒鹽禁
求遺書 命左右僕射分判六部沿途置倉運粟
以給京師

甲辰 陳以江撝為僕射 建臨春結綺望仙三閣

閣各高數十丈連延數十間牕牖壁帶縣楣欄
檻皆以沉檀為之飾以金玉間以珠翠外施珠
簾內設寶牀寶帳微風暫至香聞數里其下積
石為山引水為池雜植奇花異卉陳主自居臨
春張貴妃麗華居結綺龔孔二貴嬪居望仙複
道往來又有王李二美人張薛二淑媛袁昭儀
何婕妤江修容迭遊其上以宮人有文學者袁
大捨等為女學士江撝雖為宰輔不親政務日
與都官尚書孔範散騎常侍王嗟等文士十餘
人謂之狎客與妃嬪女學士廢和詞曲采其豔

麗者被之新聲如玉樹後庭花臨春樂之類張
麗華尤敏慧髮長七尺瞻視眇昧光采溢日照
暎左右善候人主顏色引薦宮女人咸德之百
司啓奏置貴妃於膝上共決之詩曰哲婦傾城
其是之謂歟

後梁主歸入朝于隋

隋頒甲子元曆

作廣道渠自大興城至潼關三百餘里

詔公私文翰並宜實錄與突厥和親

千金公主請改姓楊氏封大義公主

千金公主周趙王招之女也隋父之仇也不特
為宗國復仇而已後因突厥勢弱講和改姓楊
氏初上柱國竇毅之女聞隋受禪自投堂下撫
膺太息曰我恨不為男子救舅氏之患及長適
李淵竟滅隋

乙巳 陳中書通事舍人傅縡直言賜死

隋頒禮部尚書牛弘所修五禮 初作義倉

築長城

後梁主歸卒子琮立

丙午 後梁公琮廣運元年

春正月隋頒曆于突厥 刺史上佐每歲入朝考課 党項羌請降于隋

丁未陳禎明元年

陳國中妖異特衆臨平湖久草塞忽自開建七級浮圖火忽從中起飛至石頭燒死甚衆陳主自賣于佛寺為奴以厭之 陳大市令章華以直諫被殺

陳叔寶災異迭見不知自省而乃屢殺諫臣自賣為奴愚劣甚矣國安得不亡

隋開山陽瀆

山陽瀆在揚州與邗溝相通開之以便伐陳也 秋九月隋滅後梁以蕭琮為莒公

後梁蕭詧梁武孫也元帝被執據有江陵傳明帝蕭詧公琮三主凡三十三年而滅江陵今荊州

是年突厥沙鉢略可汗卒弟莫何可汗處羅侯立大食國人始至中國即西域回回人

戊申 陳主廢太子胤立張貴妃子深為太子

東冶鐵飛

冬十月隋主命晉王廣統賀若弼韓擒虎等大舉

伐陳

初隋主與陳鄰好甚篤因遣使吊喪陳後主答書倨傲隋主不悅群臣遂爭獻平陳之策及陳受蕭巖等降隋主益怒謂高頴曰我為民父母豈可限一衣帶水不拯之乎命大作戰船或請密之隋主曰吾將顯行天誅何密之有使投其柿於江曰若彼懼而能改吾復何求楊素在末安造大艦名曰五牙上起樓五層高百餘尺前後置六拍竿並高五十尺容戰士八百人次曰黃龍容百人命晉王廣秦王俊清河公楊素皆

為行軍元帥廣出六合俊出襄陽素出永安荆州刺史劉仁恩出江陵蘄州刺史王世積出蘄春廬州總管韓擒虎出廬江吳州總管賀若弼出廣陵青州總管弘農燕榮出東海凡總管九十兵五十一萬八千皆受晉王廣節度以左僕射高頴為晉王元帥長史右僕射王韶為司馬軍中事皆取決焉

巳酉隋文帝開皇九年始混一天下

春正月隋賀若弼韓擒虎兵入陳陳主投井中軍人窺井呼之不應欲下石乃以繩引之與張貴妃

孔貴嬪同束而上執之

晉王廣令高頰子德弘馳告高頰留張麗華頰斬之廣由是恨頰

王僧辯子開府儀同三司王頒發陳武帝陵焚骨取灰投水而飲之

夏五月晉王廣班師至長安獻俘太廟陳叔寶重賞陳氏子弟分置邊州給以田業進楊素爵越公賀若弼宋公弼與韓擒虎爭功帝曰二將俱上勳進擒虎上柱國有司劾其縱卒淫污陳宮不加爵邑高頰爵齊公

後突厥來朝帝命引至擒虎前曰此是執陳國天子者擒虎厲色顧之突厥惶恐不敢仰視復陳境十年餘州一年

陳自霸先篡梁都建康起武帝丁丑盡後主已酉凡五主三十三年而滅于隋

按陳後主淫亂不君隋文取之亦不為過然其心不過利其土地欲混一四海耳隋主乃曰彼若能改吾復何求將誰欺哉

以陳江搃袁憲蕭摩訶任忠為開府儀同三司江搃陳之狎客任忠賣主之賊也而與袁憲蕭

摩訶並非其倫矣

群臣請封禪不許 十二月定雅樂

庚戌 故刺史馮寶妻以平番禺夷王仲宣功封譙國夫

人

辛亥 隋主以舊憾鴆殺弟滕王瓚

是年吐谷渾可汗夸呂卒子世伏立使兄子無素

稱藩

壬子 冬十月韓擒虎卒

擒虎將卒其隣母見其門下儀衛甚盛有同王者問之荅曰我來迎王 忽不見又有人疾篤忽

驚走入門曰欲謁王左右問曰何王也曰閻羅王也左右欲撻之擒虎止之曰生為上柱國死作閻羅王足矣遂寢疾數日而卒年五十五

以楊素為僕射與高頴專掌朝政賀若弼除名

賀若弼自謂功名出朝臣之右當為宰相見素等為僕射心甚不平形於言色由是免官怨望愈甚帝下弼獄公卿奏弼當死帝曰臣下守法不移公可自求活理弼曰臣將八千兵擒陳叔寶竊以此望活帝曰此已格外重賞弼曰臣今還格外望活上低回數日特令除名歲餘復其

爵位

癸丑 作仁壽宮役死萬數 計殺大義公主

隋主以陳叔寶屏風賜突厥大義公主 公主傷感題詩屏上云 感哀等朝暮 世道若浮萍 榮華實難守 池臺終自平 富貴今何在 空事寫丹青 盃酒恒無樂 弦歌詎有聲 余本皇家子 飄流入虜庭 一朝覩成敗 懷抱忽縱橫 古來共如此 非我獨申名 惟有明君曲 偏傷遠嫁情 隋主聞而惡之 禮賜益薄 時莫仰可汗已死 其弟頡伽施多那都藍可汗嗣位 公主遂扇惑都藍 復與西面突厥泥利可汗連結 隋主恐其爲患 遣長孫晟發公主私事 詔廢之 恐都藍不從 遣牛弘將美妓四人 啗之 適處羅侯之子 染干 號突利可汗 求婚 隋主使裴矩謂之曰 當殺大義公主 方許突利 乃譖於都藍 殺之 許染干尚主

甲寅 給公卿以下職田 詔高仁英 蕭琮 陳叔寶 修其宗祀 官給器物

乙卯 收天下兵器 鑿底柱 敕盜邊糧 并以上皆斬文武官 以四考受代 仁壽宮成 以封德彝爲內史舍人

仁壽宮成制度壯麗帝大怒曰楊素爲吾結怨天下素慮獲譴封德彝曰公勿憂俟皇后至必有恩詔明日帝果召素入對后勞之曰公知吾夫婦老無以自娛盛飾此宮豈非忠孝賜錢百萬錦綃三千段素乃薦德彝於帝以爲內史舍人

丙辰 以光華公主妻吐谷渾 制工商不得仕進

詔死罪三奏然後行刑

丁巳 史萬歲擊南寧

以安義公主妻突厥突利可汗都藍可汗曰我大可汗反不如染干乎朝貢遂絕

高麗王湯卒子元嗣封爲遼東王

吐谷渾弒其可汗世伏立其弟伏允請依俗尚王從之

詔諸司論屬官罪聽律外決杖

帝以屬官不敬憚上故有是詔於是上下相驅迭行極楚以殘暴爲幹能守法爲懦弱又以盜賊繁多命盜一錢以上皆棄市三人同盜一瓜事發即死帝喜怒不恒不復依準科律刑部侍郎辛亶衣緋禪以爲厭蠱斬之元會衣劍不齊

御史不効殺之諫議大夫毛思祖諫又殺之楊
素復任情行事與鴻臚少卿陳延有隙嘗經蕃
客館庭中有馬屎又衆僕於氊上擣蒲白帝帝
怒主客令及擣蒲者皆杖殺之極延幾死又每
於殿庭杖殺人不計其數夫律者所以齊民治
天下之大法也隋文徒知制律以爲粉飾而乃
錄以爲人主法外用刑之戒

戊午 遣漢王諒將兵討高麗軍士飢疫及泛海飄沒死
十八九九月始罷

禁畜猫鬼置行宮十二所

獨孤后之弟延州刺史隋有婢能事猫鬼使之
殺人

南寧爨翫反史萬歲以罪除名

巳未 楊素等破突厥都藍可汗為部下所殺

獨孤后諧免高頰 以牛弘為吏部尚書

以突厥突利可汗為啓民可汗妻以義成公主處
之朔州

庚申 太子勇失愛於帝晉王廣結獨孤后及用張衡計

諭楊素諧廢勇為庶人立廣為太子 是日地震

賀若弼下獄 楊素譖殺史萬歲

太史萬歲伐突厥還楊素忌之奏寢其功會廢太子萬歲方與將士在朝堂稱寃帝問萬歲何在素曰謁東宮矣召見言將士有功為朝廷所抑詞意憤厲帝怒擗殺之

辛酉仁壽元年

正月以立太子改元太史令袁充詭言日景長故曰仁壽 廢太學及州縣學尋改國子學為太學 獨孤后死 太子用計譖廢蜀王秀 王通獻策不報

壬戌

甲子

秋七月帝疾太子廣居殿中逼丞陳夫人不從帝覺欲召勇楊素矯詔召廣令右庶子張衡侍疾俄而帝崩年六十四謚曰文廟號高祖咸謂廣弑之廣先丞陳夫人而後發喪即位矯詔賜勇死 流尚書柳述侍郎元巖于嶺南

冬十一月陳叔寶卒年五十二贈長城公謚煬 是年星入月長人見於鴈門 是年漢王諒以討楊素起兵敗幽死

陳叔寶入隋給賜甚厚班同三品每預宴恐致傷心為不奏吳音監守者奏言叔寶願得一官

帝曰叔寶全無心肝又聞叔寶常醉罕有醒時使節其酒既而曰任其性不爾何以過日從登卽山侍飲賦詩曰日月光天德山河壯帝居太平無以報願上東封書并表請封禪優詔答之帝又曰當賀若弼度京口彼人密啓告急急叔寶飲酒不省高熲至見啓在牀下猶未發封此誠可笑蓋天亡之也昔苻氏征伐所得國皆榮貴其主苟欲求名不知違天命與之官乃違天也觀此則隋之不與叔寶官蓋有意存焉

隋文帝雖不與陳叔寶官然優賜甚厚賢於劉裕蕭道成梁衍遠矣後唐高祖不殺隋恭帝亦天報之也

乙丑隋煬帝大業元年春正月改元

立晉王昭爲太子 春三月命楊素營東京宮室

開通濟渠自西苑引穀洛水達于河引河入汴引汴入泗以達于淮又開邗溝入江傍築御道植柳自長安至江都置離宮四十餘所遣黃門侍郎王弘等往江南造龍舟雜船數萬丁役死什四五

遣劉方擊林邑過馬援銅柱南八日至其國破之
士卒死什四五劉方卒于途

築西苑周二百里

秋七月廢滕王倫衛王集徙邊郡 八月如江都
是年熒惑入太微

緘勒叛西突厥自為莫何可汗

丙寅

太子昭卒封昭子佖為燕王侗為越王侑為代王
楚國公楊素卒 徵天下散樂

丁卯

春正月長星竟天彗星見 有星孛于文昌
三月殺故太子勇之子儼及其弟七人

改州為郡更定官制

北巡次榆林啓民可汗及義成公主來朝吐谷渾
高昌入貢 造大帳容數千人

秋七月發丁男百餘萬築長城

八月至金河甲士五十餘萬輜重千里造觀風行
殿容數百人下施輪軸又造行城周二千步樓櫓
悉備胡以為神遂幸啓民可汗帳

至濟源幸張衡宅留宴三日殺太常卿高頴尚書
宇文弼光祿大夫賀若弼

三人皆煬帝平日所忌俱坐以誹謗殺之頴母

嘗謂頰曰吾兒富貴已極但有一斫頭耳况又有斬麗華之隙在文帝時已免官乃復起為太常不知沉晦免患可為知進而不知退之戒賀若弼父敦為宇文護所殺臨刑呼弼謂曰我志平江南不果汝當成吾志吾為舌死不可不思引錐刺弼舌出血誠以慎口弼乃矜功不已兩度下獄竟以舌亡惜哉

戊辰

倭國入貢

開永濟渠

復築長城

營汾陽宮

徵鷹師至者萬人

赤土國貢方物

城萬壽戍處突厥啓民可汗

己巳

立孔子後為紹聖侯

蜀郡獲三足鳥

西域獻地置西海等郡

改東京為東都

突厥啓民可汗死立其子咄吉為始畢可汗

殺薛道衡

道衡以才學見忌房彥謙勸其杜絕賓客卑辭下氣而不能從以此見殺可為專工詞藻者之戒

庚午

春正月有盜稱彌勒佛入建國門作亂平之連坐

千餘家

諸蕃來朝陳百戲以示

三月如江都以王世充領宮監

陳稜等泛海擊流求克之

穿京口至餘杭河八百餘里 徵高麗王元入朝
不至

張衡諫修汾陽宮出為榆林太守敕督江都宮謂
薛道衡枉死為楊玄感所奏除名

辛未

春二月自將伐高麗自江都御龍舟入永濟渠至
涿郡從官有隨船徒步行三千餘里死者什一二
命幽州總管元弘嗣往東萊海口造船工役累死
甚衆夏四月至涿郡

秋七月發江淮以南民夫及船運黎陽洛口諸倉
米至涿天下騷動

鄒平王薄歛人張金稱落人高士達河間格謙等
相聚兵起漳南人竇建德為二百人長乘亂而起
人爭附之各郡縣盜起不可勝計

砥柱崩堰河流逆行數里

壬申 以一百一十三萬三千八百人為二十四軍伐高
麗全陷九軍帝怒鎖宇文述歸至東都述素有寵
子士及尚南陽公主故不誅與于仲文俱除名止
斬劉士龍以謝天下

張衡為其妾告怨望賜死

張衡臨死大言曰我為人作何等事而望久活
監刑者促殺之

道士潘誕煉金丹作嵩陽觀所費鉅萬鑿石膽石
髓不得欲以童男女膽髓各三斛六斗代之帝怒
斬誕

癸酉 以代王侑留守西京越王侗留守東都秦王浩隨
征高麗大集兵涿郡

復宇文述官爵

夏四月進圍遼東以飛樓雲梯地道攻城二十餘
日不拔

六月楊素子楚公楊玄感起兵黎陽圍東都以李
密為謀主帝以遼城不下造布囊百萬貯土積與
城齊又造八輪樓車俯射城中會玄感報至潛引
師回資械委棄

秋八月玄感引兵趣潼關宇文述等追敗之玄感
自殺李密賂守者脫逃

治玄感黨與殺三萬餘人枉死者太半玄感所交
文士王胄亦被殺

初楊玄感問計於李密密曰天子遠在遼左去
幽州尚千里南限鉅海北走彊胡號令所通惟

榆林一道若鼓而入薊直扼其喉高麗抗其前
我乘其後不旬月資糧竭舉麾召之衆可盡取
傳檄而南天下定矣上計也關中四塞之地留
守衛文昇易與耳直趣長安據函嶠制諸夏中
計也若因近趣便先趣東郡頓兵堅城下不可
以勝負決下計也玄感出其下計故速敗

熒惑入南斗

是年濟陰孟海公起兵據周橋見人引書史輒殺
之

齊郡丞張須陁擊破王薄歷城羅士信年十四善
擊賊為之副

唐縣宋子賢善幻化稱彌勒佛出世作無遮大會
謀襲乘輿事泄伏誅

扶風索門向海明亦以彌勒佛教集衆稱帝改元
白鳥楊義臣擊破之

餘杭劉元進聚亡命於三吳以應楊玄感會玄感
敗吳郡朱燮晉陵管崇推元進為天子據吳郡燮
崇俱為尚書僕射毘陵東陽會稽諸處豪傑俱應
之帝遣吐萬緒魚俱羅擊斬管崇時人心思亂敗
而復聚有司希旨劾緒等怯懦俱羅坐斬萬緒被

徵道卒更遣江都丞王世充發江淮兵討之元進
變俱敗死世充於佛寺焚香立誓約降者不殺既
而盡阮之死者三萬於是餘黨復起

章丘杜伏威與臨濟輔公柘兵起掠江淮

以唐公李淵為弘化留守

李淵隴西成紀人七世祖高晉末據秦涼是為
西涼武昭王傳子歆為沮渠蒙遜所滅四傳至
虎為西魏太尉賜姓文野氏佐周代魏禪封唐
公虎生昞昞生仁仁生淵復李姓俱襲封唐公
淵從母即隋文獨孤后

甲戌

復征天下兵伐高麗三月如涿郡所徵兵多不至

高麗亦疲弊請降乃班師高麗王元竟不入朝

冬十一月祀南郊大風

離石胡劉苗王兵起自稱天子以其弟六兒為求

安王劉淵之後也

汲郡王德仁起兵據林慮山

扶風唐弼推李弘為天子自稱唐王

延安劉迦輪自稱皇王改元大世屈突通平之

齊郡孟讓起兵掠盱眙王世充擊破之

太史令庾質論伐高麗以直言死

以張須陀為河南討捕大使

乙亥 以讖殺郟公李渾夷其族

初高祖夢洪水沒都城惡之遷都中興至是方
士言李氏當有天下渾族盛從子將作監敏小
名洪兒帝疑其名應讖宇文述誘敏妻誣告渾
謀因度遼襲御營立敏為帝殺渾敏夷其族敏
妻亦鳩死

孔雀集朝堂高德儒指為鸞朝臣稱賀

東海李子通擁衆度淮自號楚王改元明政寇江
都

譙郡朱燦以縣吏從軍亡命為盜謂之可達寒賊
自稱迴樓羅王寇荆襄

丙子 作毘陵宮 宴群臣西苑

夏四月大業殿災

納言蘇威以直言盜賊除名

秋七月如江都殺諫臣任宗崔民象王愛仁

韋城翟讓坐事當斬獄吏竒其貌釋之同郡單雄
信善馬槊離狐徐世勣年十七有勇略俱從之李
密亡命投讓攻滎陽討捕使張須陀敗死

鄱陽操師乞自稱元興王改元始興陷豫章御史

劉子翊討平之其黨林士弘代統其衆殺子翊自稱皇帝國號楚改元太平

以李淵為太原留守王威高君雅副之

楊義臣擊張金稱高士達斬之竇建德併其衆取饒陽

虞世基以帝惡聞盜賊奏罷義臣兵

王世充擊斬格謙其黨高開道領其衆掠燕地

虎賁郎將羅藝起兵涿郡自稱幽州總管

丁丑大業十三年

恭帝義寧元年

春正月竇建德稱長樂王改元丁丑據河北

魯郡徐圓朗兵起陷東平

二月馬邑校尉劉武周朔方郎將梁師都俱殺其郡守起兵附于突厥突厥俱遣以狼頭纛立武周為定楊可汗取樓煩定襄鴈門諸郡

師都為大度毗伽可汗取雕陰弘化延安諸郡

武周改元天興國號漢

師都改元永隆國號梁俱僭稱皇帝

左翊衛蒲城劉子和坐事徙榆林會郡中亂子和執郡丞斬之開倉賑濟自稱永樂王南連梁師都北附突厥始畢以劉武周為定楊天子梁師都為

解事天子子和為平陽天子子和固辭更為屋利
設

金城校尉薛舉起兵隴西稱西秦霸王七月徙據
天水稱帝國號秦改元秦興以子仁杲為太子
翟讓李密據興洛倉擊敗東都兵讓推密為魏公
改元永平以單雄信徐世勣為左右將軍祖君彥
為記室

河南討捕使裴仁基殺監軍御史蕭懷靜以虎牢
降密密以為上柱國又得秦叔寶程咬金為驃騎
羅士信為總管移檄數隋主十罪

越王侗遣人至江都告急虞世基曰越王年少被
人誑耳

夏五月李淵以其子李世民與晉陽令劉文靜官
監裴寂之計殺副留守王威高君雅起兵太原遣
使稱臣突厥資其士馬自稱大將軍以裴寂為長
史劉文靜為司馬唐儉溫大雅為記室

武威司馬李軌起兵河西自稱涼王改元安樂
李密取黎陽倉泰山道士徐鴻客上書勸李密因
士馬之銳直趣江都挾帝以令天下密異其言邀
之已亡去 李密用計殺翟讓

綱目不同據史傳書之

柴紹妻李氏及李神通各起兵應李淵入關群盜悉降

後梁宣帝孫蕭銑起兵巴陵自稱梁王

冬十一月李淵入長安立代王侑為皇帝年一十三改元義寧尊隋主廣為太上皇自為大丞相封唐王以子建成為世子世民為秦公元吉為齊公河池太守蕭瑀隋將屈突通俱降唐遣使下巴蜀是年桂陽人曹武徹反改元通聖

按楊廣弒逆無道天下叛之李淵興吊伐之師如湯武之於桀紂可也而乃效六朝故智以求禪代豈有人臣擅立一君又尊其君為太上皇之理乎

八代紀要卷之十六終

人代紀要卷之十七

明吳興顧應祥編集

大埔黃宸校刊江陰湯明善校正

庠生倪佩 臧繼華同校

戊寅

隋大業十四年 恭帝侑義寧二年 恭帝侗皇泰元年 唐高祖武德元年

春正月唐王淵自加殊禮劍履上殿贊拜不名

三月隋宇文化及弒隋主廣立秦王浩居別宮以

兵守之秦王浩者高祖第三子秦孝王俊之子也

江都糧盡從駕驍果多關中人思歸謀亂即將

司馬德戡直閣裴虔通等推宇文化及為主入

人代紀要 卷之十七
宮弒帝帝問今日之事誰為首曰溥天同怨何止一人化及使封德彝數帝罪帝曰卿士人何為亦尔德彝慚而退趙王杲年十二在側號慟虔通斬之血濺御衣帝命鴆酒馬文舉不許使令狼行達縊殺之年五十蕭后令宮人撤牀簀為棺埋之後將軍陳稜移塋吳公臺下發歛容貌若生唐後改塋雷塘謚曰煬齊王暕及宗室無少長皆死虞世基裴蘊來護兒等俱被殺

梁蕭銑稱帝江陵改元鳴鳳修復園廟 吳興太守沈法興起兵據江表十餘郡 夏五月李淵加

十有二旒天子旌旗出警入蹕尋受禪即皇帝位改元武德是為唐高祖皇帝立子建成為太子世民為秦王元吉為齊王廢隋主侑為鄴國公 東都留守官聞隋主被弒立越王侗為帝侗眉目如畫溫厚仁愛改元皇泰王世充為納言元文都為內史令共掌朝政

煬帝既被弒則越王乃宜立者綱目書侗稱帝于東都論者乃謂煬帝弒父其子孫不得與漢昭烈比然侑亦煬帝孫也愚按李淵之立侑王世充之立侗皆假此為名以圖禪代耳非為隋

也侑為鄴國公侗為潞國公同一廢耳唐能全
侑而世克乃弒侗此人心之所以歸唐也

宇文文化及西還長安李密拒之敗化及于黎陽密
奉表降隋為太尉封魏公 王世克殺元文都隋
主侗以世克為僕射 長樂王竇建德定都樂壽
國號夏改元五鳳 秦薛舉卒子仁果立秦王世
民攻之出降復斬于市 李軌降唐封涼王復叛
稱帝改元安樂 李密為王世克攻敗將士多降
隋復奉表降唐封邢國公復叛行軍總管盛彥師
討斬之 宇文文化及兵勢日蹙嘆曰人生固當死

豈不一日為帝乎遂鴆殺秦王浩稱帝於魏縣國
號許改元天壽朱燦稱帝山南國號楚改元昌達
徐世勳降唐賜姓李 羅藝降唐以為幽州總管
唐以西突厥曷蘇那可汗為歸義王 高開道據
漁陽自稱燕王改元始興 唐以樂工舞胡安叱
奴為散騎侍郎 是年沙門高曇晟反自稱大乘
皇帝以尼靜宣為耶輸皇后改元法輪

隋自楊堅以辛丑年受周禪盡恭帝丁丑年禪
唐凡三主三十七年

巳卯 二月置租庸調法 朱燦降唐以為楚王復殺唐

使奔東都 竇建德執宇文化及于聊城斬之收
傳國璽為隋帝發哀拜蕭后奉表于隋封夏王

唐以隋降臣宇文士及為上儀同封德彞為內史
王世充將秦叔寶程咬金俱降唐 咬金名知節

夏四月王世充逼隋主侗禪位稱皇帝國號鄭改
元開明廢隋主侗為潞國公立子玄應為太子玄

恕為漢王以蘇威為太師陸德明為漢王師 唐
安興貴執李軌殺之河西平 夏竇建德聞王世

充自立乃建天子旌旗出警入嘑立齊王暕遺腹
子政道為鄭公猶倚突厥義成公主迎蕭后建德

遣之又以宇文化及首獻公主 五月王世充弒

隋主侗侗請與太后訣不許飲鴆不死縊殺之謚

曰恭帝 徐圓朗降唐以為兗州總管 羅士信

降唐以為陝州行軍總管 秋八月唐鄴國公卒

謚曰恭帝 唐殺民部尚書劉文静 沈法興稱

梁王于毗陵改元建康 李子通稱吳帝于江都

改元明政 杜伏威降唐以為和州總管 賜羅

藝姓李氏破夏兵 李世勣父為竇建德所執奔

降建德虜王世充將劉黑闥以獻建德 是年突

厥始畢可汗死弟處羅可汗立

唐之有天下始於劉文静之謀高祖以宿隙殺之失之薄矣

庚辰 李世勤復歸唐 突厥立楊政道為隋王居定襄 秦王世民擊破宋金剛尉遲敬德降劉武周走死 高開道降以為蔚州總管賜姓李 突厥處羅可汗死弟頡利可汗咄苾立 李子通滅沈法興

立老子廟

晉州人吉善行言於羊角山見白衣老父曰為吾語唐天子吾為老君而祖也詔於其地立廟 後世所謂太上老君始此

辛巳

竇建德虜孟海公併其衆 秦王世民擊王世充 敗走進圍洛陽竇建德率兵救之世民分兵洛陽 自以驍勇東趣武牢擒建德至洛陽城示世充世充出降世民入東都收隋圖籍得傳國八璽班師 獻俘斬建德赦世充為庶人獨孤修德矯赦殺之 初行開元通寶錢 竇建德故將劉黑闥復起漳 南徐圓朗舉兵應之 蠲太常樂工為民 秦王世民為天策上將開館延文學之士

司勳郎中杜如晦記室考功郎中房玄齡及于志寧軍諮祭酒蘇世長天策府記室薛收文學

褚亮姚思廉太學博士陸德明孔穎達主簿李
玄道天策倉曹參軍事李守素王府記室參軍
事虞世南參軍事蔡允恭顏相時著作即攝記
室許敬宗薛元敬太學助教蓋文達軍諮點簽
蘓勗並以本官為學士

李靖趙郡王孝恭伐梁蕭銑降執歸殺之巴蜀嶺
表悉平

唐兵圍江陵銑問策於岑文本文本勸銑降銑
謂群臣曰天不祚梁不可復支矣必待力屈則
百姓蒙患柰何以我之故陷百姓於塗炭乃詣

軍門曰當死者惟銑耳百姓無罪願勿殺掠按
蕭銑故梁之後志圖恢復比群盜不同况兵至
即降宜待以不死優以官爵可也

杜伏威執李子通送長安 高開道復叛稱燕王
改元始興

劉黑闥稱漢東王改元天造秦王世民破之奔突
厥 秦王世民擊徐圓朗杜伏威入朝 楚林士
弘卒其衆自散 李子通至藍田為吏所獲伏誅
太子建成擊劉黑闥

癸未 劉黑闥敗走其所署刺史諸葛德威執送太子斬

之 平陽公主薨即柴紹妻 徐圓朗走死地入
唐 幽州摠管李藝入朝 以裴寂蕭瑀爲僕射
楊恭仁封德彝爲中書令 淮南行臺僕射輔公
祐詐稱杜伏威貽書起兵稱帝丹陽國號宋詔趙
郡王孝恭李靖討之

甲申武德七年混一天下 置州縣鄉學 詣國子學釋

奠先聖先師 高開道爲其下所殺以其地爲媯

州 吳王杜伏威卒 平輔公祐 是年封高麗

建武爲遼東王

乙酉 許突厥吐谷渾互市 西突厥遣使請昏許之

丙戌 初令州縣里閭各祀社稷 以傅奕言沙汰僧道

省寺觀 夏六月太子建成齊王元吉欲殺秦王

世民爲世民所殺遂以世民爲皇太子

世民與建成元吉有隙以洛陽形勝恐一朝有

變欲出保之建成夜召世民飲以鴆酒吐血數

升高祖謂世民曰首建大謀削平海內皆汝之

功吾欲立汝爲嗣而汝固辭且建成爲嗣日久

不忍奪也觀汝兄弟似不相容當遣汝居洛陽

自陝以東皆主之仍建天子旌旗如梁孝王故

事將行建成元吉慮秦王至洛陽難制密謀殺

世民於是秦府僚佐房玄齡等勸世民先發伏兵玄武門世民射殺建成尉遲敬德射殺元吉併殺建成元吉諸子十人

以王珪魏徵為諫議大夫帝自稱太上皇以

高士廉為侍中房玄齡宇文士及為中書令蕭瑀

封德彝為僕射秋八月太子世民即位年三十

是為太宗皇帝改明年為貞觀元年立長孫氏

為皇后與突厥盟于便橋出宮女三千人

冬十月追封故太子為息隱王齊王為海陵刺王

立子承乾為皇太子年八歲張蘊古上大寶箴

以為大理丞

丁亥唐太宗貞觀元年分天下為十道關內河南河東

河北山南隴右淮南江南劍南嶺南令諫官隨

宰相入閣議事皇后率內外命婦親蠶封德

彝死蕭瑀為左僕射長孫無忌為右僕射

戊子罷周公祀始以孔子為先聖顏回為先師

瓊山丘氏曰此後世學校專祀孔子之始前此

所謂先聖者周公也先師者孔子也後世特以

顏子配享孔子亦始于是

梁師都為其下所殺以其地為夏州祖孝孫奏

唐雅樂

殺瀛州刺史盧祖尚復追悔 復出宮

女三千人 以王珪為侍中 立薛延陀夷男為

真珠可汗

巳丑

裴寂坐與妖人相通流靜州卒 以房玄齡杜如

晦為僕射魏徵守秘書監參預朝政 上皇徙居

太安宮 常何薦馬周以為監察御史 李靖討

突厥 杜如晦以疾罷

浮屠法雅坐妖言惑眾辭連裴寂免官削封邑

半歸故郡汾陰狂男子謂寂奴曰公有天分奴

告寂寂不敢聞遣奴殺言者又如盜封邑錢而

萬寂捕急遂上變流靜州會山羗反或言劫寂

為主帝曰寂必不爾既而寂率家僮破賊帝念

寂功詔入朝會卒年六十

按唐之有天下其謀始於劉文靜以告裴寂而

文靜才名與軍功俱出寂之上唐祖素忌文靜

而待之反薄因事殺之太宗亦不能救及即位

亦不見錄其子孫及讀文靜本傳始知貞觀三

年已復官爵以其子樹義襲魯國公尚主則太

宗有以報之矣未嘗不念文靜也

庚寅 李靖破突厥於陰山 溫彥博為中書令戴胄參

預朝政蕭瑀參議朝政 四夷君長請帝為天可
汗許之 杜如晦卒 林邑入貢 修洛陽宮張
玄素諫止 禁鞭背 李靖為右僕射 定服制
三品以上紫四品五品緋六品七品綠八品青
侯君集參議朝政 高昌王麴文泰入朝 大有
年

辛卯 詔僧道拜父母 以金帛賜突厥贖男女八萬口
削京觀為墳 葬高麗戰亡士 殺大理寺丞張
蘊古 開党項地為十六州 康國求內附不受
河內李好德有心疾為妖言蘊古按之以有疾

不當坐治書侍御史權萬紀劾蘊古阿縱帝怒
殺蘊古既而悔之詔自今死罪雖令即決仍三
覆奏

壬辰 群臣請封禪不許 置三師官 詔天下行鄉飲
酒禮

癸巳 以魏徵為侍中 李淳風造渾天儀 頒新定五
經 縱囚三百九十人來歸赦之 定內外官七
百三十員

甲午 李靖為特進三二日至中書平章政事 吐蕃遣
使入貢 聘鄭仁基女為充華魏徵以其曾許人

諫止 中牟丞皇甫德參直言以為監察御史

西突厥咄陸可汗死弟沙鉢羅唃利失可汗立

乙未 夏五月太上皇崩在位九年壽七十一謚大武廟

號高祖塋獻陵上元元年改謚神堯皇帝天寶八

載謚神堯大聖皇帝十三載增謚神堯大聖大光

孝皇帝 分民貲為九等 李靖破吐谷渾

丙申 朱俱波甘棠入貢 以溫彥博為右僕射楊師道

為侍中魏徵為特進知門下省事 長孫皇后崩

權萬紀言采銀黜之 突厥阿史那社爾未降

禁上書告訐

丁酉 公主嫁王珪子敬直行婦禮 預為山陵終制容

棺而已 以武士韞女為才人年十四

戊戌 頒氏族志 吐蕃寇松州侯君集擊敗之復請婚

許之 西突厥乙昆咄陸可汗立 以薛延陀貢

珠二子為小可汗分其勢

己亥 王珪卒 停襲封刺史 如九成宮突厥結社率

作亂襲御營斬之 以懷化郡王阿史那思摩賜

姓李立為泥孰俟利苾可汗帥種落還舊部 以

楊師道為中書令劉洎黃門侍郎參知政事

參政始此

太史令傅奕卒 西突厥啞利可汗死子乙毘沙鉢羅葉護可汗立號南庭咄陸彌北庭

庚子 命諸儒撰五經正義 流鬼國入貢 侯君集滅

高昌以其地為西州置安西都護有司劾君集等私其寶貨下獄岑文本言釋之 李淳風考定戊寅曆

辛丑 以文成公主嫁吐蕃 將行封禪褚遂良諫止之

西突厥咄陸可汗殺訶鉢羅可汗 薛延陀攻突厥李世勣破之 以吐蕃祿東贊為右衛將軍欲以琅琊公主女妻之答曰臣國中妻不可棄竟不受

壬寅 西突厥咄陸可汗為其下所逐遣使立射瓊可汗

以新興公主嫁薛延陀 高麗泉蓋蘇文弑其王建武立王弟子藏自為莫離支

癸卯 春正月魏徵卒給羽葆鼓吹陪葬昭陵其妻裴氏以徵平日儉素悉辭不受以布車載柩而葬帝自

製碑文書石以衡山公主妻其子叔玉 圖功臣於凌烟閣

長孫無忌趙郡王孝恭杜如晦魏徵房玄齡 高士廉尉遲敬德李靖蕭瑀段志玄劉弘基

屈突通殷開山柴紹長孫順德張亮侯君集
張公謹程知節虞世南劉政會唐儉李世勣
秦叔寶等

夏四月太子承乾謀反廢為庶人立晉王治為皇
太子年一十六貶魏王泰為東萊郡王誅侯君集
以長孫魚忌兼太子太師房玄齡兼太傅蕭瑀為
太保李世勣為詹事瑀世勣並同中書門下三品
同三品始此蓋以僕射為尚書之長兼同侍中
中書故謂之三品

薛延陀來納幣詔絕其昏

薛延陀真珠可汗遣姪納幣獻羊馬契苾何力
言不可與婚帝曰已許之矣可食言乎何力對
曰敕夷男使親迎彼必不來則絕之有名乃詔
幸靈州召真珠可汗會禮其臣皆勸阻真珠曰
我得見天子死亦不恨羊馬經沙磧耗死過半
乃責以聘禮不備絕之司馬公曰太宗審知薛
延陀不可妻初勿許可也既許而絕之雖薛延
陀可滅亦可羞也王者發言出令可不慎哉

遣使冊高麗王藏為遼東郡王

陪魏徵碑

初徵嘗薦杜正倫侯君集有宰相才至是正倫
以罪黜君集反誅帝疑徵阿黨乃罷叔王尚主
而踣所撰碑

新羅乞兵伐高麗遣使諭之蓋蘇文不奉詔李世
勣勸征高麗褚遂良諫不聽徙故太子承乾於
黔州順陽王泰於均州追黜封德彝官爵改謚
曰謬

甲辰 承乾卒 以劉洎為侍中岑文本馬周為中書令
褚遂良為黃門侍郎參預朝政 突厥徙居河南
可汗李思摩入朝 却高麗貢

岑文本拜中書令有憂色母問其故答曰非勳
非舊責重位高是以憂也或勸營產業歎曰吾
一布衣無汗馬勞以文墨致宰相奉稍已過殖
產何為觀此則古之宰相必有功勳者而後為
之後世徒以文士入相欲以處天下之大事惡
乎可哉

乙巳 春正月帝發洛陽親征高麗以張亮李世勣為行
軍大總管 封比干墓 夏四月諸軍至玄菟新
城 李世勣拔蓋牟城 五月張亮拔卑沙城
帝度遼拔遼東城 進軍白巖城降之 六月攻

安市城不下 秋九月班師遣使祀魏徵少牢復
立所製碑 祭戰亡士卒 薛延陀真珠可汗死
其次子拔灼殺其兄曳莽而自立是為多彌可汗
贖諸軍所虜高麗民萬四千口 以譖殺侍中劉
洎

丙午 遣大理卿孫伏伽等以六條巡察四方 殺刑部
尚書張亮

或告亮有反謀按之不服百官皆言亮反當誅
獨將作少監李道裕言亮反形未具不當死帝
不聽斬之後歲餘刑部侍郎缺帝曰朕得其人
矣以李道裕補之

按唐太宗悔殺張蘊古詔死罪雖令即決仍三
覆奏劉洎張亮之死又不聞三覆何耶

李世勣擊薛延陀降之帝自詣靈州招撫其酋長
皆喜請入朝回紇等十一姓各遣使歸命乞置官
司帝大喜題詩勒石曰雪耻酬百王除凶報千古
丁未 始以左丘明等二十二人從祀孔子 復伐高麗
以牛進達李世勣為行營大總管 以巢刺王妃

楊氏所生子明為曹王繼刺王後 發江南工人
造大船 突厥車鼻可汗遣使入貢 骨利幹遣

使入貢

戊申 結骨侯利簇入朝 隋后蕭氏卒 西突厥葉護

阿史那賀魯降以為瑤池都督 王玄策使天竺

執其王阿羅那順以歸 以讖殺李君羨 房玄

齡卒遺表諫伐高麗 回紇吐迷度可汗為其下

所殺詔立其子婆閏 阿史那社爾擊龜茲執其

王布失畢立弟葉護為王西域震駭

巳酉 出李世勣為豐州都督 李靖卒 夏五月帝崩

年五十三謚曰文廟號太宗上元元年謚文武聖

皇帝天寶八載謚文武大聖皇帝十三載增謚文

武大聖大廣孝皇帝太子治即位年二十二是為

高宗 長孫無忌楮遂良受遺詔輔政徵李世勣

為開府儀同三司並同三品 葬昭陵

初李世勣有疾太宗自剪鬚和藥又謂曰朕求

諸臣托幼孤者無以踰公公不負李密豈負朕

哉至是又以其與太子無恩而先黜之則前日

所謂可托孤者何相背耶

人代紀要卷之十七終

人代紀要卷之十八

明吳興顧應祥編集

大埔黃宸校刊 江陰湯明善校正

庠生倪佩 臧繼華同校

庚戌唐高宗永徽元年

正月改

詔日引刺史入閣問民疾

苦 立妃王氏為皇后 高侃擊突厥車鼻可汗

擒之

辛亥

罪獻鷹隼犬馬者

于志寧張行成為僕射同三

品 高季輔為侍中

焚鞠 西突厥賀魯殺射

瓊可汗自立為沙鉢羅可汗

壬子 立子忠爲皇太子 吐谷渾新羅高麗百濟並遣使入貢 梁方破處月朱邪於牢山

癸丑 房玄齡子遺愛及高陽公主謀立荆王元景事覺俱伏誅誣殺吳王恪 西突厥咄陸可汗死其子頡苾達度設號真珠葉護與沙鉢羅有隙擊破之尋爲沙鉢羅所併

甲寅 以才人武氏爲昭儀 帝在萬年宮夜大水漂溺三千餘人衛士皆走薛仁貴登門大呼帝上馬得出 武后自殺其女誣皇后

唐高宗初政清明自武氏入宮即昏亂矣

乙卯

以李義府爲中書侍郎參知政事 李義府表請立武氏爲后李勣許敬宗俱勸之褚遂良以諫貶潭州都督 冬十月廢皇后王氏爲庶人立昭儀武氏爲皇后 王后與淑妃蕭氏俱幽于別院帝聞行至其所呼之王后泣曰至尊若念疇昔使得再見日月幸甚帝曰即有處置武后聞之怒遣人斷去手足投酒甕中曰令二姬骨醉數日而死又斬之 命百官四夷朝武后於肅儀門 武后改王后姓蟒氏蕭氏爲梟氏

丙辰顯慶元年春正月廢太子忠爲梁王立武氏子弘爲

太子年四歲大赦改元 贈后父武士護司徒周國公 以高祖配昊天於園丘太宗配五帝於明堂 是年武后見王后爲祟遷都洛陽

丁巳 李義府兼中書令 帝隔日視事 天竺方士娑

婆寐采長生藥不就放還 許敬宗爲侍中 杜

正倫爲中書令 蘇定方擊沙鉢羅分爲興昔亡

繼往絕二可汗 從武后意以洛陽宮爲東都

戊午 徙安西都護府于龜茲 鄂公尉遲敬德卒不通

賓客者一十六年卒年七十四

太宗嘗謂尉遲敬德曰朕以女妻卿何如敬德

謝曰臣妻雖陋相與共貧賤久矣臣雖不學古

人富不易妻非所願也觀此則敬德可謂知道

者矣宜其明哲保身也

褚遂良卒

己未 貶長孫無忌黔州安置許敬宗遣人逼令自殺

庚申 廢梁王忠爲庶人 蘇定方伐百濟其王義慈降

冬十月令皇后決百司奏事

辛酉 龍朔元年 二月改元 復遣行軍大總管率三十

五軍擊高麗

壬戌 春正月改百官名

以門下省爲東臺中書爲西臺尚書省爲中臺
侍中爲左相中書令爲右相僕射爲匡政左右
丞爲肅儀尚書爲太常伯侍郎爲少常伯

以許圜師爲左相許敬宗上官儀同三品 三月

鄭仁恭等敗鐵勒于天山薛仁貴發三矢殺三人
餘皆請降 颶海總管蘇海政矯詔殺興昔亡可

汗繼往絕可汗亦死十姓無主附于吐蕃 西突

厥寇庭州刺史來濟戰死

癸亥 李義府爲右相以賊貶流雋州 改明年爲麟德

元年 是年吐谷渾可汗曷鉢爲吐蕃所攻棄國

走地入吐蕃

吐谷渾自晉永嘉有國至是凡三百五十年

甲子麟德元年 以劉祥道鄧德玄爲左右相 冬十二

月武后誣故太子忠謀逆賜死

武后專恣帝不能堪會宦者王伏勝發其使道

士郭行真出入禁中獻禱帝密召上官儀草詔

欲廢后左右奔告后遽至帝羞縮乃曰我無此

意上官儀教我儀與伏勝曾事太子忠后乃使

許敬宗誣奏與忠謀大逆儀伏勝皆死妻子藉

沒賜忠死劉祥道罷自是權歸于后天子拱手

而巳中外謂之二聖

乙丑 行麟德曆 以陸敦信為右相 冬十月車駕發

東都十二月至泰山 幸張公藝家九世同居

丙寅乾封元年 春正月封禪泰山改元 尊老聃為太

上玄元皇帝 李義府死 李勣伐高麗 劉仁

軌為右相 武后以私憾殺其兄之子武惟良武

懷運

丁卯

戊辰總章元年

三月改

四月彗星見五車許敬宗等獻

諛以為高麗將滅之兆 李勣等平高麗分為州

縣立安東都護府 以姜恪闔立本為左右相

巳巳 李勣死 以李敬玄郝處俊同三品 以身言書

判取人

庚午咸亨元年

春三月改

天旱武后請避位不許

贈武士護為太原王

辛未

壬申 許敬宗死

癸酉

甲戌上元元年 武后始請父在為母服齊衰三年

秋八月帝稱天皇后稱天后改元 封武承嗣為

周國公 武后表便宜十二條行之

乙亥 太子弘忤武后意尋卒人謂后鳩之謚孝敬皇帝

立雍王賢為太子賢韓國夫人所生也 劉仁軌

破新羅 帝患頭風議武后攝政以郝處俊諫止

丙子儀鳳元年 武后誣蕭妃子郇王素節賊賄降鄱陽

王袁州安置 十一月太赦改元 以狄仁傑為

侍御史 李敬玄中書令

丁丑

戊寅

百官四夷朝武后于光順門 夏四月以旱大赦

改明年為通乾十二月罷通乾

己卯調露元年 六月大赦改元 命太子賢監國

庚辰永隆元年 秋八月改 武后廢太子賢帝欲宥之

不能以英王哲為太子大赦改元永隆

辛巳開耀元年 九月彗星見改元 春正月宴百官及

命婦于麟德殿 太平公主適薛紹

壬午永淳元年 二月以孫重照生滿月大赦改元賜酺

三日立孫重照為皇太孫 李善感諫營宮室

癸未弘道元年 夏四月綏州步落稽埋銅佛于地候草

生其上給人曰佛光見掘出惑眾作亂討平之

冬十二月帝崩在位三十四年壽五十六謚曰天

皇大帝廟號高宗葬乾陵天寶八載改謚天皇大
聖皇帝十三載增謚天皇大聖大弘孝皇帝太子
哲即位更名顯是為中宗改元弘道武后稱制

初帝患頭重不能視侍醫秦鳴鶴請刺頭出血
武后不欲帝疾愈怒曰此可斬也乃欲於天子
頭刺血帝曰刺之未必不佳乃刺之帝曰吾目
似明矣后舉手加額自負綵百匹賜鳴鶴

甲申唐

中宗嗣聖元年
睿宗文明元年二月改

武后光宅元年九月改

春正月立妃高氏為皇

后 二月武后廢帝為廬陵王立高宗第八子豫

王旦改元文明是為睿宗居于別宮不預政事以
旦長子成器為太子廢太孫重照為庶人武后始
御紫宸殿 春三月武后使將軍丘神勣逼故太
子賢自殺仍追封雍王 夏四月武后遷帝于房

州又遷均州 以武承嗣同三品 秋九月武后

改元光宅改服色官名立武氏七廟 以東京為

神京尚書省為文昌臺僕射為左右相六曹為天

地四時六官門下省為鸞臺中書為鳳閣侍中為

納言中書令為內史御史臺分為左右肅政臺

始許諫官風聞言事 李敬業起兵討武后不克

武后殺侍中裴炎以騫味道為內史李景湛同平章事

初中宗欲以后父韋玄貞為侍中裴炎固爭中宗怒曰我以天下與韋玄貞何不可炎懼白太后密謀廢立至是徐敬業兵起后問計於炎炎請太后反政豫王則不討自平矣武承嗣使監察御史崔愷劾炎有異志騫味道李景湛證炎必反遂斬于都市炎以一言廢主自謂托於太后竟不能保其身何耶

乙酉

武后垂拱元年

春正月大赦改元垂拱 三月遷

廬陵王于房州 鄆郡馮小保以賣淫藥與千金公主私通公主薦于武后令削髮為僧改名懷義入宮營造僧人唐扮不袒跣始此 以阿史那元慶為興昔亡可汗

丙戌

武后假歸政豫王旦復稱制 置銅匱受密奏

以胡人索元禮為游擊將軍按制獄周興為秋官侍郎來俊臣為御史中丞羅織人罪 以突厥斛瑟羅為繼往絕可汗 有山擁出新豐改名慶山 以狄仁傑為冬官侍郎

丁亥

武后殺同三品劉禕之 虢州人楊初成矯迎中

宗武后殺之

戊子 武后加號聖母神皇 作天堂以僧懷義為威衛
大將軍封梁國公 琅邪王冲越王貞舉兵匡復
不克而死武后遂大殺唐宗室

己丑

武后永昌元年正月改

載初元年十一月改

春正

月武后大饗萬象神宮大赦改元永昌賜酺七日
夏四月武后殺汝南王煒等一十二人及天官侍
郎鄭玄挺 秋九月以僧懷義為新平道大總管
討突厥 閏月武后殺同平章事魏玄同 冬十
月武后殺鄭王璿等六人 冬十一月武后自名

聖改元載初元年始用周正以十一月為正月十

二月為膺月夏正月為一月除唐宗室屬籍

雌鷄變雄

庚寅

武后天授元年

是年以永昌元年十一月為正月

文改元天授 二月武后始策貢士於洛城殿進

士廷試始此 武后以武承嗣為左相武攸寧為

納言流韋方質于儋州賜死 醴泉人侯思止誣

告刺史裴貞與舒王元名謀反武后流元名於和

州貞族滅思止求為御史后曰卿不識字對曰獬

豸何嘗識字但能觸邪武后悅從之 僧法明等

偽造大雲經言武后乃彌勒佛下生當代唐為閻浮提主頒其經于天下建寺藏之 侍御史傅游藝表請改國號易姓武后佯不許而擢游藝給事中百官宗戚附和請者六萬餘人武后秋九月改國號曰周稱皇帝以豫王旦為太子賜姓武游藝暮年之間歷衣青綠朱紫人謂四時仕宦 以徐有功為侍御史

辛卯

狄仁傑為平章事 酷吏周興流嶺南為仇人所殺 傳游藝夢登湛露殿為所親告自殺 鳳閣舍人張嘉福使王慶之等數百人請立武承嗣為

太子平章格輔右相岑長倩不從俱被殺武后以李昭德言亦知其非杖殺慶之 武后以革命有功升釋氏於道教之上

壬辰

武后如意元年

長壽元年

來俊臣誣狄仁傑魏元

忠等下獄仁傑獄中上書召見得白與魏元忠俱出為縣令 夏四月武后幸少年改元如意 九月又改元長壽 武承嗣罷李昭德同平章事

癸巳

婁師德同平章事 裴匪躬私謁皇嗣腰斬

皇嗣被誣安金藏剖心 武后自號金輪聖神皇帝 侯思止私畜錦杖殺之

甲午 武后延載元年

杜景儉同平章事 僧懷義燒天

堂 夏五月武后加號越古金輪神聖皇帝改元

延載 鑄天樞 武后陰使人毆殺懷義

乙未

武后證聖元年 天冊萬歲元年

春正月武后加號慈氏越古

金輪神聖皇帝改元證聖大赦賜酺三日 二月

武后去慈氏越古稱號 秋九月武后稱天冊金

輪大聖皇帝改元天冊萬歲 安平王武攸緒隱

嵩山

丙申

武后萬歲登封元年 萬歲通天元年

是年膺月武后封神岳改元萬

歲登封大赦免租稅賜酺十日 三月明堂成名

通天宮改元萬歲通天 婁師德擊吐蕃敗績吐

蕃尋請和 姚元崇為夏官侍郎 武懿宗誣刺

史劉思禮謀反族滅平章事李元素等三十六家

流其親屬千餘人來俊臣復用 武后嬖幸張昌

宗張易之 徐有功為殿中侍御史 婁師德同

平章事

武曩信任酷吏殺戮無辜然獄中猶得上書召

見蓋當時立法之善至於想徐有功用法平恕

起為侍御史亦可見天理之在人心未嘗泯也

丁酉

武后神功元年

鑄九鼎用銅五十六萬七百餘斤

武承嗣奪右司郎中喬知之妾碧玉知之作綠珠怨詩碧玉赴井死承嗣誣知之謀反族誅之來俊臣誣御史李昭德謀反又欲羅告諸武衆發其罪弃市併殺昭德 秋九月武后改元神功 狄仁傑同平章事 魏元忠為肅政中丞

戊戌

武后聖曆元年

正月武后改元聖曆 三月武后以

狄仁傑言召帝還東都 狄仁傑兼納言舉其子光嗣為地官員外郎 九月突厥陷趙州刺史高叡不屈而死 武后以帝為皇太子復名顯賜姓武為河北道元帥狄仁傑副之以討突厥默啜擁

兵還漠北

武后以豫王旦為相王

置控鶴監

是年蘇味道姚元崇魏元忠同平章事

己亥

狄仁傑薦張柬之為秋官侍郎

帝及武攸暨等

誓于明堂

婁師德卒

武后疾禱少室山給事

申閭朝隱自為犧牲

庚子

武后人視元年

武后改控鶴監為奉宸府以張易

之為奉宸令選美少年為內供奉武三思奏張昌宗為王子晉後身使羽衣吹笙乘大鶴文士賦詩美之 狄仁傑薦張柬之為秋官侍郎 夏五月武后改元久視罷天冊金輪大聖號賜酺五日

秋八月造大像。九月狄仁傑卒。冬十月復以寅月爲歲首。

辛丑

武后大足元年 長安元年

正月武后以成州言

佛跡見改元大足。三月雨雪蘇味道以爲瑞。帥百官賀殿中侍御史王求禮獨不賀。時有獻三足牛者。宰相欲賀。求禮曰：「凡物反常爲妖。」武后爲之愀然。郡王重閏議張易之兄弟。武后杖殺之。十月武后改元長安。

壬寅

始設武舉

賜張昌宗鄴國公

癸卯

張昌宗譖貶魏元忠爲高要尉。流張說嶺南。遣

使以六條察州縣。

甲辰

張柬之崔元暉同平章事

以楊再思爲內史

張昌宗有罪下獄赦之

己巳

神龍元年

春正月張柬之崔玄暉敬暉桓彥

範袁恕已率兵斬張易之張昌宗徙武后上陽宮

加則天大聖皇帝中宗復位改元神龍去周號復

以神京爲東都。以張柬之袁恕已同三品。崔玄

暉爲內史。敬暉桓彥範爲納言。流貶周宰相韋

玄慶房融崔神慶于嶺南。復以楊再思祝欽明

同三品。武攸暨爲司徒。武三思爲司空。宮婢上

官婉兒爲昭儀與武三思通薦于韋后三思出入
禁中專制 胡僧慧範以妖妄得幸冒反正功加
銀青光祿大夫賜爵上庸縣公出入宮掖 以術
士鄭普思爲秘書監葉靜能爲國子祭酒 徵武
攸緒爲太子賓客辭去 用韋后武三思計賜敬
暉等五人王爵罷其政事 群臣上帝號應天皇
帝韋后順天皇后 九月武后卒年八十一謚大
聖則天皇后天寶八載加謚則天順聖皇后 是
年尊祖考老子爲玄元皇帝

丙午

立衛王重俊爲皇太子 太平安樂公主各開府

置官屬 武三思貶敬暉等爲遠州司馬使周利
用稱御史至嶺外東之玄暉已死彥範曳竹槎之
上肉盡至骨後杖殺之暉尚而殺之恕已服野葛
汁毒憤培地爪甲殆盡仍捶殺之

處士韋月將䟽論武三思流嶺南廣州都督劉仁
軌斬之

張易之黨宋之問及弟之遜自流所逃回匿於友
人駙馬都尉王同皎家之遜密告同皎欲殺武三
思廢韋后同皎自剄於比干廟之間之遜皆除京

官

鄭普思作亂帝庇之不誅流儋州

賜閩鄉僧萬回號法雲公

丁未景龍元年九月改

秋七月韋后以太子重俊非其所生惡之武崇訓謀廢太子太子與李多祚發羽林兵誅武三思武崇訓兵潰而死以其首祭三思崇訓

帝加應天神龍皇帝后加順天翊聖皇后

魏元忠貶卒

蕭至忠宗楚客紀處訥同三品

僧慧範姦贓削爵

遣使江淮贖生

戊申安樂長寧公主上官婕妤皆以斜封墨勅除官

安樂公主再適其夫之弟武延秀

安樂公主奪民田作定昆池

置修文館學士侍宴賦詩以上官昭容第其文

是年張仁愿築三受降城尋同三品

徵武攸緒入朝不受寵錫而去召近臣守歲

巳酉觀宮女拔河戲開宮市

韋巨源楊再思左右僕射同三品再思死后兄韋

溫李嶠蘇環唐休璟俱同三品韋安石侍中蕭至

忠中書令 祀南郊韋后亞獻

庚戌唐温王 唐隆元年 六月後睿宗 景雲元年

春正月帝與韋后微行觀燈御梨園

四月幸隆慶池祝欽明作八風舞

夏六月韋后淫亂人言其有逆謀帝快快后懼安

樂公主欲后臨朝已為皇太女合謀餅中進毒弑

帝年五十五在位二十七年為武后所制止為帝

六年謚孝和皇帝廟號中宗天寶十三年加謚大

和大聖大昭孝皇帝

太平公主與上官昭容草遺制立少子温王重茂

年一十六是為殤帝改元唐隆韋后稱制

宗楚客葉靜能勸后如武后故事以韋氏子弟領

南北軍

相王旦子臨淄王隆基起兵誅韋后安樂公主宗

楚客武延秀等盡滅韋氏之族尊父旦為帝改元

景雲廢重茂復為温王隆基自為平王尋立為太

子

劉幽求參知機務李日知同三品蕭至忠等俱貶

秋八月汴州刺史鄭愔與譙王重福舉兵欲誅韋

氏改元中元敗死愔被誅

罷斜封官數千人

姚元之爲中書令

以西城隆昌二公主爲女官

宋璟爲吏部尚書姚元之兵部尚書

辛亥唐睿宗景雲二年

郭元振張說同平章事

徙溫王重茂爲襄王 復斜封官

命皇太子監國

太平公主謀廢太子事覺蒲州安置尋召還

貶姚元之申州刺史宋璟楚州刺史

韋安石中書令復爲左僕射同三品李日知竇懷

貞俱爲侍中

冬十月安石日知懷貞與郭元振張說俱罷

劉幽求罷又與魏知古崔湜並同三品

陸象先同平章事

召天台道士司馬承禎至京辭還山

是年置十道按察使

壬子太極元年

延和元年

玄宗先天元年

春正月用賈曾議合祭天地于南郊改元太極

竇懷貞岑羲同三品羲尋爲侍中

太平公主引蕭至忠為刑部尚書

五月祭北郊 改元延和

竇懷貞以相者言其有刑厄乞為安國寺奴復以
為左僕射平章軍國重事

秋八月帝傳位太子隆基是為玄宗皇帝年二十八
改元先天立妃王氏為后帝自為太上皇仍總大

政

以劉幽求為僕射同三品魏知古侍中崔湜中書
令

流劉幽求于封州

刑部尚書李日知致仕

人代紀要卷之十八 終

人代紀要

卷之十八

八

卷之八



